



Broj: 12-08-5-1049-2/2018
Sarajevo, 9.3.2018. godine

n/r Svi predsjednici općinskih/osnovnih sudova
n/r Svi predsjednici kantonalnih/okružnih sudova
n/r Svi predsjednici okružnih privrednih sudova
n/r predsjednik Višeg privrednog suda u Banja Luci
Apelacioni sud Brčko Distrikta BiH
Osnovni sud Brčko Distrikta BiH

Predmet: Provođenje „Sedmica sudske nagodbe“ u sudovima u BiH

Poštovani,

U skladu sa zaključkom Stalne komisije za efikasnost i kvalitet sudova Visokog sudskog i tužilačkog vijeća Bosne i Hercegovine (u nastavku: Stalna komisija VSTV-a BiH), aktivnost „Sedmice sudske nagodbe“ se od 2018. godine provodi kvartalno u svim sudovima u BiH. Kao i do sada, sudovi imaju obavezu da u odabranom periodu zakažu ročišta u što većem broju predmeta u kojima postoji mogućnost sklapanja sudske nagodbe, te da se stranke što aktivnije upute da riješe predmete na ovaj način.

Period implementacije naredne aktivnosti je 16.-27. april 2018. godine.

Do sada su aktivnosti „Sedmice sudske nagodbe“ dale dobre rezultate, te je primjetna pojačana aktivnost sudova u periodu njihove implementacije. Tako je rezultat prve aktivnosti (oktobar 2016. godine) bio 833 sudskih nagodbi, rezultat druge (april 2017. godine) 697 nagodbi, a rezultat treće aktivnosti (novembar 2017. godine) bio je 576 nagodbi. Iako je taj broj u opadanju, on iznosi znatno više od mjesečnog prosjeka zaključenih sudskih nagodbi u ostalim periodima. Međutim, naglašavamo da je analizom rada svih sudova pojedinačno uočeno da određeni sudovi ulažu izuzetne napore i ostvaruju nadprosječne rezultate, dok izostaje adekvatan angažman pojedinih sudova.

U skladu sa navedenim, pozivamo predsjednike sudova i sudije da i ovaj put aktivno pristupe pripremi i organizaciji ove aktivnosti, uz efikasno organizovanje rada u sudu koji će omogućiti ostvarenje dobrih rezultata. Cilj koji pravosuđe ima jeste kontinuirano povećanje broja predmeta riješenih mirnim putem na godišnjem nivou, pri čemu će se posebna pažnja posvetiti sudovima koji u prethodnom periodu nisu ostvarivali zadovoljavajuće rezultate.

VSTV BiH poziva predsjednike sudova da izrade i provedu plan aktivnosti koje će poduzeti na području mjesne nadležnosti svog suda u cilju organizacije i promocije „Sedmica sudske nagodbe“ među strankama i javnosti.

Nadalje, potrebno je da predsjednici sudova poduzmu pripremne radnje za realizaciju aktivnosti, te obavijeste sudije i stručne saradnike da identificiraju predmete po kojima će postupati tokom „Sedmica sudske nagodbe“. Nakon identifikacije predmeta, potrebno je, uz poziv za pripremno ročište/glavnu raspravu ili strankama u žalbenom postupku, dostaviti i poziv da svoj spor riješe sudskom nagodbom. Do **30.3.2018. godine** predsjednici suda su VSTV-u BiH obavezni dostaviti liste izdvojenih predmeta po kojima će postupati s ciljem sklapanja nagodbe u toku trajanja aktivnosti.

U prilogu ovog dopisa ponovo dostavljamo unificirani obrazac – „Obavijest za stranke“, čiji sadržaj je usvojen od strane Stalne komisije VSTV-a BiH na sastanku održanom 09. juna 2016. godine, a koji je potrebno dostaviti strankama u predmetima koji se vode pred sudom, odnosno sa istim upoznati širu javnost, u formi koju smatrate prikladnom (putem web portala, oglasnih ploča u sudu i dr.).

Također, podsjećamo da je u okviru Projekta unapređenja efikasnosti pravosuđa II, u okviru kojeg je aktivnost i inicirana, u saradnji s Centrima za edukaciju sudija i tužilaca u FBiH i RS (u nastavku: Centri), osigurana kontinuirana obuka sudija na temu sudske nagodbe, koja je postala sastavnim dijelom godišnjih programa rada Centara. Stoga, još jednom koristimo priliku da Vas podsjetimo na važnost specijalizirane obuke s ciljem unapređenja znanja i vještina sudija kada je u pitanju mirno rješavanje sporova.

Kao i do sada, VSTV BiH će s posebnom pažnjom pratiti pripreme aktivnosti, te izraditi detaljan izvještaj o ostvarenim rezultatima svakog suda.

Podsjećamo da obaveza na promociju mirnih načina rješavanja sporova proističe iz strateških dokumenata za bh. pravosuđe, kao što je Strategija za reformu sektora pravde (2014. – 2018.) i preporuke Strukturalnog dijaloga o pravosuđu između BiH i Evropske unije. Stoga, aktivnosti u vezi mirnih načina rješavanja sporova predstavljaju i strateško opredjeljenje VSTV-a BiH.

S uvjerenjem da će aktivnost „Sedmice sudske nagodbe“ ove godine zabilježiti i bolje rezultate, srdačno Vas pozdravljam.

S poštovanjem,

The image shows a blue circular official stamp of the VSTV BiH (Bosnian Judicial Council). The stamp contains the text 'BOŠNANSKO-HERCEGOVINA' at the top, 'SUDBENO I TUŽILAČKO VIJEĆE' in the middle, and 'VSTV BIH' at the bottom. A handwritten signature in blue ink is written over the stamp, with the name 'Milan Tegeltija' printed below it. The signature is written in a cursive style.

Predsjednik
M.P.
Milan Tegeltija

Prilog: - Obavijest za stranke

Dostavljeno:

- Naslovu;
- a/a

OBAVIJEST ZA STRANKE
„Sedmice sudske nagodbe“

Poštovani,

Ovim putem želimo da Vas informišemo o provođenju aktivnosti „Sedmice sudske nagodbe“ u našem Sudu.

Na inicijativu Visokog sudskog i tužilačkog vijeća BiH u svim prvostepenim i drugostepenim sudovima u BiH organizuje se provođenje aktivnosti „Sedmice sudske nagodbe“.

Period implementacije aktivnosti je 16.-27. april 2018. godine.

Cilj organizovanja „Sedmica sudske nagodbe“ jeste rješavanje što je moguće većeg broja predmeta mirnim putem, u skraćenom postupku, koji je ekonomičniji i brži za stranke. Na ovaj način se želi izvršiti pozitivan utjecaj na efikasnost sudskih postupaka te promjenu pristupa suda i stranaka rješavanju sporova, gdje se kao prioritet postavlja brzo i efikasno rješavanje, s akcentom na zadovoljstvo stranaka na ishod spora i uslugu suda.

U skladu sa navedenim pozivamo sve zainteresovane stranke, a čiji se predmeti vode pred ovim Sudom, da u navedenom periodu pristupe sudu te riješe svoj predmet sudskom nagodbom.

Ukoliko želite Vaš predmet riješiti sudskom nagodbom to možete učiniti na način da informišete sudiju koji vodi Vaš predmet, na jedan od sljedećih načina:

- **samostalno ili preko svog zastupnika uputite pismeni prijedlog za zaključenje sudske nagodbe;**
- **samostalno ili preko zastupnika kontaktirajte sudiju kako bi zajednički dogovorili termin za ročište za sklapanje sudske nagodbe;**
- **zajedno sa suprotnom strankom, te zastupnikom ukoliko ga imate, u toku navedenog perioda, pristupite na sud sa prijedlogom za zaključenje sudske nagodbe.**

Prednosti sudske nagodbe

Sudska nagodba predstavlja:

Kraći i efikasniji postupak

Vaš spor se okončava zaključivanjem sudske nagodbe pred prvostepenim sudom. Sporazum stranaka se unosi u zapisnik koji stranke potpisuju. Sudska nagodba ima status izvršne isprave, bez drugostepenog žalbenog postupka u predmetu.

Jeftiniji postupak

Sudska nagodba je privilegovana sa aspekta plaćanja sudske takse, a prema odredbama Zakona o sudskim taksama. Zaključivanje sporazuma među strankama znatno skraćuje vrijeme trajanja spora, te na taj način reducira i ostale potencijalne troškove nastale u vezi sa sudskim postupkom.

Jednostavniji postupak

U slučaju da se spor riješi zaključenjem sudske nagodbe stranke i sud su pošteđeni dugotrajnog vođenja postupka, nepotrebnog pribavljanja i izvođenja dokaza, odlaganja/odgađanja ročišta, dugotrajnog postupka namirenja, eventualnog drugostepenog postupka te dodatnih troškova koji nastaju pri tome.

Sigurnost i povjerenje

Sudska nagodba je izvršna isprava – stranke su u obavezi postupiti prema dogovoru navedenom u zapisniku o sudskoj nagodbi, jednako kao po pravosnažnoj i izvršnoj presudi. U slučaju da dužnik ipak ne postupi po postignutoj nagodbi, na osnovu nje je moguće pokrenuti postupak za prinudnu naplatu (izvršni postupak). Time se stranke oslobađaju dodatnog vođenja parničnog postupka pred sudom.

Prednost rješenja spora između stranaka zaključenjem sudske nagodbe je i očuvanje poslovne saradnje ili privatnih odnosa između stranka u postupku. Prilikom zaključenja sudske nagodbe stranke same biraju način rješenja spora i nagodba predstavlja njihov međusobni dogovor. U tom slučaju istinski sami odlučujete o sudbini Vašeg spora.

S poštovanjem,
